

खबरां

- विदेश मंत्री डा. एस. जयशंकर होरें अज्ज नमीं दिल्ली च क्वाड मुलखें दे विदेश मंत्रियों दी लग्गी दी मीटिंग दी अध्यक्षता कीती। क्वाड मुलखें स्थित ते सुरक्षित उर्जा बजारें गी लेइयै बचनबद्धता जाहिर कीती ऐ।
- भारत ते अमरीका नै सप्लाई सरिस्ते गी मजबूत करने, खनन ते खनिज पदार्थें ते धरती दे बिरले तत्वें दे प्रसंस्करण गी लेइयै इक्क महत्वै आहले समझौते पर दस्तखत कीते न।
- केंद्री गृह मंत्री अमित शाह होरें राजस्थान च बन्ने आहली चैकी सांथू दा दौरा लाया। उनें राज्य दे बन्ने आहले इलाकें च वाइब्रेंट विलेज प्रोग्राम-2 दी शुरूआत कीती।
- केंद्र सरकार नै जनसांख्यिकीय बदलाव सरबन्धी चुनौतियों कन्नै निब्वडने लेई इक्क उच्च स्तरीय कमेटी दा गठन कीता ऐ।
- भारत सनें दुनिया भरै थमां लक्खां बदे लोक अज्ज सऊदी अरब च हज यात्रा करा'रदे न।
- ते हुनै कोला किश चिरें बाद IPL च अज्ज रायल चैलेंजर्स बैंगलुरु ते गुजरात टाइटन्स बश्कार मैच खेड्ढेआ जाहग।

<><><><><><>

EAM-Quad

विदेश मंत्री डा. एस. जयशंकर होरें अज्ज नमीं दिल्ली च क्वाड मुलखें दे विदेश मंत्रियों दी लग्गी दी मीटिंग दी अध्यक्षता कीती। आस्ट्रेलिया दी विदेश मंत्री पेनी वोंग, जपान दे विदेश मंत्री तोशिमित्सु मोतेगी ते अमरीका दे विदेश मंत्री मार्को रुबियो होर इस मीटिंग च शामिल हे। मीटिंग दे मगरा इक्क सांझे पत्रकार सम्मेलन गी संबोधित करदे होई डा. जयशंकर होरें इक दुए दी सहायता करने लेई क्वाड मुलखें बश्कार साथ-सहयोग गी होर मजबूत करने पर जोर दित्ता। उनें आखेआ जे अज्ज दी मीटिंग बड़ी फायदे आहली रेई। एहदे च मुख ध्यान हिंद प्रशांत कन्नै जुडे दे प्रासांगिक मुद्दें पर हा।

<><><><><><>

India-US

भारत ते अमरीका नै अज्ज महत्वै आहले खनिजें ते बिरले धरती दे तत्वें दी सप्लाई, खनन ते प्रसंस्करण गी यकीनी बनाने दे मकसद कन्नै इक्क दपक्खी ढांचे पर दस्तखत कीते न। एह ऐतिहासिक समझौता दिल्ली च विदेश मंत्री डा. एस जयशंकर ते अमरीका दे विदेश मंत्री मार्को रुबियो हुंदे बश्कार होआ। विदेश मंत्री होरें आखेआ जे एह ढांचा लचीली ते बक्ख-बक्ख सप्लाई श्रृंखलाएं गी मजबूत करग, दौनें मुलखें गी वित्त पोषण च साथ-सहयोग करने च मदाद करग।

<><><><><><>

DoT-WiFi

दूर संचार मैहकमे नै प्रधानमंत्री वाईफाई एक्सेस नेटवर्क इंटरफेस पी.एम वानी दे ढांचे तैहत नागरिकें लेई इंटरनेट दी बरतून गी सौकखे बनाने दी दिशा च कई सुधार कीते न। एह्दे च लैपटाप ते होर उपकरणें लेई क्यूआर आधारित प्रमाणीकरण, लचीली घट्ट समें आहली वाई-फाई योजना दी शुरूआत ते सौकखे पंछान ते बेहतर भरोसेमंदी लेई पीएम वार्ता हाटस्पाट नाएं दा मानकीकरण शामिल ऐ।

<><><><><><>

DGCA

नागर विमानन महानिदेशालय (DGCA) नै Congo ते Uganda च इबोला रोग दे प्रकोप गी विश्व सेहत संगठन आसेया सार्वजनिक सेहत सरबन्धी अंतराष्ट्री चिंता दे रुप च घोषित कीते जाने दे बाद Airlineएं लेई मानक संचालन प्रक्रिया जारी कीती ऐ। DGCA नै आखेआ ऐ जे Uganda ते Congo कन्नै ब्हाई डोआरियां चलाने आली एअलाइनें गी जरूरी ऐ जे ओह यात्रियें दे उतरने शा पैहले Self Declaration यानि आप-घोषणा फार्म भराइयै जमा करना यकीनी बनान।

<><><><><><>

Amit-Shah Rajasthan Visit

केंद्री गृह मंत्री अमित शाह होरें आपरेशन सिंदूर दरान सीमा सुरक्षा बल (बी.एस.एफ) दी भूमिका दी तरीफ कीती ऐ। उनें आखेआ जे बीएसएफ नै नां शड़ा बन्ने दी बहादुरी कन्नै रक्षा कीती, सगुआं बन्ने आहले जिलें दे लोकें दा मनोबल बी बढ़ाया। उन्नै बन्ने गी पूरी चाल्ली सुरक्षित बनाने लेई बीएसएफ, फौज, प्रशासन ते नागरिकें गी कन्नै मलाइयै इक्क 4 स्तरीय ग्रिड बनाने पर जोर दित्तां अमित शाह होर अज्ज राजस्थान दे बीकानेर कोल बीएसएफ दी सांथू चौकी पर प्रहरी सम्मेलन च भाशण देआ करदे हे। उनें आखेआ जे इस ग्रिड दी मदाद कन्नै बन्ने पर पैदा होने आहले खतरें दा पूरी ताकत कननै मुकाबला कीता जाई सकदा ऐ। श्री शाह होरें बन्ने दी सुरक्षा च सीमावर्ती ग्राएं दे बसनीकें दी भूमिका दा जिक्र करदे होई आखेआ जे इनें ग्राएं च भलाई-बेहतरी आहली योजनाएं गी असरदार ढंगै कन्नै लागू कीता जाना चाइदा। उनें आखेआ जे प्रधानमंत्री मोदी हुंदी अगुवाई आहली सरकार दे तैहत देश दी सुरक्षा बवस्था च बड़ी बड़ी तब्दीली आई ऐ।

<><><><><><>

Centre-Demographic Committee

केंद्र सरकार नै घुसपैठ ते होरनें वजहें कन्नै जनसंख्या च होने आहले बदलाव सरबन्धी चुनौतियं कन्ने निब्वडने लेई इक्कउच्च सतह कमेटी दा गठन कीता ऐ। केंद्री गृह मंत्री अमित शाह होरें इक सोशल मीडिया पोस्ट च दस्सेआ जे इस कमेटी दी अध्यक्षता सुप्रीम कोर्ट दे साबका जज, प्रकाश प्रभकर नाओलेकर होर करडन। मर्दमशुमारी सरबन्धी कमीशनर हुंदे कन्नै साबका आई.ए.एस अधिकारी दुर्गा शंकर मिश्रा, साबका आई.पी.एस अधिकारी बालाजी श्रीवास्तव ते अर्थ शास्त्री डा. शमिका रवि होरेंगी इस कमेटी दा मेम्बर बनाया गेआ। प्रधानमंत्री नरेंद्र मोदी होरें पिछले बरे लाल किले सवां

Haj

भारत सनें दुनिया भरै थमां लक्खां बदे लोक अज्ज सऊदी अरब च हज यात्रा करा'रदे न। 5 रोजा हज दे पैहले दिन कल हज यात्री मीना दी टेंट सिटी च किठे होए। हज यात्रिएं अज्ज पूरा दिन अराफात दे मैदान च इबादत कीती। कल बडुलै हज यात्री मीना परतोई औडन- जित्थे ओह कुर्बानी ते कंकड मारने दी प्रतीकात्मक रस्म पूरी करडन।

<><><><><><>

CM-Raabita

मुख्यमंत्री उमर अब्दुल्ला होरें लोकें गी मिलियै उंदियां दिक्कतां-शकैतां सुनने लेई शुरू कीते गेदे अपने राबिता कार्यक्रम तैहत अज्ज श्रीनगर च लोकें दे केई शिष्टमंडलें कन्नै गल्लबात कीती जेहदे च मुख्य तौरा पर बैंकिंग, युवा विकास, विरासत दे संरक्षण, कला ते संस्कृति गी बढावा देने सरबन्धी मुद्दे पर गल्लबात होई। जम्मू-कश्मीर बैंक दे प्रबंध निदेशक ते सी.ई.ओ, अमित्व चटर्जी होरें उनेंगी बैंक दे कम्में ते एहदिएं उपभोक्ता सेवाएं दे बारे च जानकारी दित्ती। एनसीसी महानिदेशक विरेन्द्र वत्स होरें एनसीसी दे नौजवानें गी कन्नै जोड़ने दे जतनें ते पैहलकदमिएं बारै उंदे नै गल्लबात कीती। INTACH दे शिष्टमंडल नै मुख्यमंत्री होरें गी कश्मीर दे विरासती सरमाए दे संरक्षण बारै जानकारी सांझी कीती। मुख्यमंत्री होरें इलाके दे सांस्कृतिक, कलात्मक, पुरातत्व ते भवन निर्माण शैली सरबन्धी परम्पराएं गी औने आहिलियें पीढ़िएं लेई संजोइयै रखने दे सरकार दे धेइये गी फही पक्का कीता।

<><><><><><>

CM-Budgam

मुख्यमंत्री उमर अब्दुल्ला होर अज्ज उस बच्ची दे घर गे जेहदा पिछले रोज दुष्कर्म मगरा हत्या दा मामला सामने आया हा ते ओहदे परिवार आहलें कन्नै दुख ते हमदर्दी प्रगट कीती। उनें इस वैश्याना घटना पर गैहरा रौळ ते बसोस जतांदे होई परिवार आहलें गी इस तकलीफ गी जरने दी समर्थ देने दी प्रार्थना कीती। उनें आखेआ कि इस घटना नै पूरे समाज दी रूह कम्बाइयै रखी दित्ती ऐ ते आखेआ कि इक सभ्य समाज च ऐसे तत्वे लेई कोई थाह नेइ, ऐ जेहड़े मनुक्खता गी तार-तार करदे न। उमर अब्दुल्ला होरें परिवार गी भरोसा दोआया जे दोषिएं गी बखशेया नेई जाहग ते कनून तैहत उनेंगी सखत कोला सखत सजा दोआई जा, इस गल्लै गी जकीनी बनाया जाहग।

<><><><><><>

Para Taekwando

जम्मू-कश्मीर दे अंतरराष्ट्री पैरा ताइक्वांडो एथलीट चंदीप सिंह नै 25 मई 2026 गी मंगोलिया च आयोजित 11मीं एशियाई पैरा ताइक्वांडो चैंपियनशिप च 80 किलोग्राम शा मते वर्ग च सुन्ने दा तगमा जित्तियै केंद्र शासित प्रदेश दा मान बधाया ऐ। अंतरराष्ट्री मंच पर उंदी काबले-जिक्र उपलब्धि दी समूलचे केंद्र शासित प्रदेश च व्यापक तौरा पर सराहना कीती जा'रदी ऐ। जम्मू-कश्मीर खेडू काउंसल नै चंदीप सिंह गी मुबारकबाद दित्ती ऐ ते ओहदे समर्पण, लग्न ते जुझारू जज्बे दी तरीफ कीती ऐ। खेडू अधिकारिएं आखेआ ऐ जे एह जित्त खित्ते लेई गर्व दा पल ऐ ते मुख्य भरै दे युवा खडारिएं लेई प्रेरणा ऐ।

IPL

IPL-2026 हून अपनी खीरी पडांस पर पुज्जी गेदा ऐ। अज्ज इस 19में सीजन दा पैहला क्वालीफायर मैच हिमाचल प्रदेश दे धर्मशाला च हिमाचल प्रदेश क्रिकेट स्टेडियम च रायल चैलेंजर्स बेंगलुरू ते गुजरात टाइटन्स बश्कार खेड्डेआ जाह्ग। मैच हुनै कोला किश चिर मगरा ठीक साड्डे 7 बजे शुरू होगा। Gujrat Titans नै टास जित्तियै पैहले गेंदबाजी करने दा फैसला लैते दा ऐ। मैच दे मता दिलचसप रौहने दी मेद ऐ कीजे दौनें टीमें दा एंट शैल भखे दा ऐ ते दवें लीग स्टेज पर 18-18 अंक हासल करियै बरोबरी पर न। अज्ज जेहड़ी बी टीम मैच जित्ती दी ऐ, ओहू सिद्धे फाइनल च पुज्जी जाह्ग जिसलै जे हारने आहली टीम गी इक होर मौका थ्होग ते ओहदा मकाबला एलीमिनेटर दी टीम दे जेत्तु कन्नै क्वालीफायर टू च होगा।